

**Radiukkut tv-kkullu aallakaatitsisarneq pillugu Inatsisartut Inatsisissaannut nr. xx, xx.  
xxxx 2014-imeersumut siunnersuut**

**pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap**

**ISUMALIUTISSIISUTAA**

**Siunnersuutip aappassaaneerneqarnerani saqqummiunneqartoq**

Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap suliarinninnermini makkuninnga inuttaqarpoq:

Inatsisartunut ilaasortaq, siulittaasup tullia Per Berthelsen, Siumut  
Inatsisartunut ilaasortaq, sinniisussaq tullia Karl-Kristian Kruse, Siumut  
Inatsisartunut ilaasortaq, sinniisussaq, Juliane Henningsen, Inuit Ataqtigiit  
Inatsisartunut ilaasortaq, Harald Bianco, Inuit Ataqtigiit  
Inatsisartunut ilaasortaq, Randi Broberg, Partii Inuit

UPA 14-mi ulloq 1. april 2014-mi siullermeerinerup kingorna siunnersuut Kultureqarnermut,  
Ilinniartitaanermut, Ilisimatusarnermut Ilageeqarnermullu Ataatsimiititaliap misissorpaa.

**Siunnersuutip imarisaa**

Radio tv-lu pillugit inatsisip atuuttup pisariaqartitanut KNR-ip Opinionimit 2012-imi  
arlaannaannulluunniit attuumassuteqanngitsumik misissuiffigineqarnerani ilaatigut  
tikkuarneqartunut naleqqussarnissaa siunnersuutikkut siunertarineqarpoq.

Siunnersuutip ilaatigut kingunerissavaa KNR-ip siulersuisuini ilaasortat arfineq marlunniit  
tallimanut ikilineqarnerat. Ilaasortaq ataaseq KNR-imi aalajangersimasumik atorfillit  
inassuteqarnerisigut toqqarneqartassaaq ilaasortallu sinneri Naalakkersuisunit  
toqqarneqartassallutik. Siulersuisuni ilaasortat aningaasaqarnerup, niuernerup aammalu  
sulisunik piginnaangorsaanerup aqutsinerullu iluani sulianik ilisimasaqarlutik  
piginnaasaqarnerunissaat siunnersuutip aamma kingunerissavaa.

Sulianiaqatigiiffiit/soqutigisaqatigiiffiit inassuteqarsinnaatitaasut assigiinngitsut  
isummaminnik KNR-ip siulersuisunut apuussinnaanissaat qulakkeerniarlugu Atuisut  
Siunnersuisoqatigiivini siunnersuisartussanik pilersitsinissaq pillugu aalajangersakkamik  
siunnersuut aamma imaqarpoq.

Kiisalu inuttaasunut nalinginnaasumik soqutiginaatillit inuiaqatigiinnut paasissutissiissutinik nalunaaruteqarnissamut KNR-ip pisussaaffianik erseqqissaanermik inatsisissatut siunnersuut imaqarpoq.

Aammalu tapiissuteqartarnermut maleruagassat allannngortinneqarnissaat pisariaqartinneqartinneqarsimavoq, taakkumi allaffissornikkut ajornartorsiutinik assigiinngitsunik siusinnerusukkut pilersitsisarsimmata.

### **Inatsisartut siunnersuummik siullermeerinninnerat**

#### **Siumut**

Inatsisip atuuttup radiomut tv-mullu tunngasutigut pisariaqartitsinermut Opinionip arlaannaannulluunniit attuumassuteqanngitsumik misissuineranit paasineqartumut naleqqussarneqarnissaa Siumut ataatsimut isigalugu isumaqatigineqarpoq. Nuna tamakkerlugu utoqqaat peqatigiiffiisa kattuffiat kiisalu KANUNUPE Atuisut Siunnersuisoqatigiivnut inassuteqarsinnaatitaanissaat Naalakkersuisunit isumaliutigineqassasoq Siumut isumaqarpoq, tassa isumaqartoqarmat tusarnaartartut isiginnaartartullu amerlasuut taakkunangaanneersuusut.

#### **Inuit Ataqtigiit**

Inuit Ataqtigiit inatsisissatut siunnersuut isumaqatigaat, KNR-illi siulersuisuini inissat tamarmik naalakkersuinikkut toqqarneqartarnissaannik Naalakkersuisut siunertarisaat Inuit Ataqtigiinnit isumaqatigineqanngillat. KNR-ip siulersuisuisa naalakkersuinikkut toqqarneqartalerneerisigut tamat oqartussaaqataaneranni malitassat atorunnaarsinneqassasut Inuit Ataqtigiit isumaqarput. Piginnaasai aallaavigalugit KNR-ip siulersuisuini siulittaasoq Naalakkersuisunit sukkulluunniit toqqarneqartassasoq aammalu KNR-ip ingerlanneqarnerani suliassanut piumasarineqartunut taanna tulluuttuussasoq Inuit Ataqtigiit isumaqarput.

#### **Atassut**

KNR-imi siulersuisunut ilaasortanik naalakkersuinikkut toqqaasarneq taakkulu amerlassusissaat kiisalu eqaatsumik ingerlatsinissaq siuarsarneqarsinnaaqullugu siulersuisunut ilaasortanut annertusumik piumasaqarnissamik Naalakkersuisut inassuteqaataat pillugit apeqqutit nalornissutaasinnaasut suulluunniit oqaluuserinissaat Atassutip piareersimaffigaa.

Atassut isumaqarpoq najukkani radiomut tv-mullu tapiissutit ikilineqarnissaannik Naalakkersuisut kissaataat aatsaat ingerlanneqarsinnaasoq najukkani radioqarfinnut tv-qarfinnullu kingunerisassai paasinarsereerpata.

**Demokraatit**

Inatsisissatut siunnersuutip ilaa siulersuinut ilaasortanit tallimaasunit ilaasortanik sisamanik Naalakkersuisut toqqaanissaannik imaqartoq Demokraatit isumaqatiginngilaat. Partii isumaqarpoq tamat oqartussaaqataaneranni tungavissat atorunnaarsinneqassasut aammalu siulersuisut pissaanermik tigumminnituusut sinnerlugit iliuuseqartarnissaat aarlerinaateqartoq. Aammattaaq siulersuisunut ilaasortat maanna arfineq marluusut attatiinneqassasut aammalu Atuisunut Siunnersuisoqatigiiliornissamik isumassarsiaq taamaatinneqassasoq. Siulersuisunut ilaasortaasut suliamut ilisimasaqarnerullutillu aningaasaqarnermik, inatsisilerinermik aammalu sulisunik piginnaanngorsaaneramik aqutsinermillu paasisimasaqartariaqarnerannik Naalakkersuisut oqarnerat Demokraatit isumaqatigaat.

**Partii Inuit**

Atuisut Siunnersuisoqatigiiviniq soqutigisaqatigiiffinnut sinniisuusussanik pilersitsinissamik siunnersuutip imaqarnera Partii Inuit pitsaasutut isigaat. Siunnersuutip ilaa siulersuisunut ilaasortat arfineq marlunnit tallimanut ikilineqarnissaannik kinguneqartussat, tamatumalu peqatigisaanik siulersuisunut ilaasortanit tallimaasunit sisamat Naalakkersuisunit toqarneqartarnissaat Partii Inuit isumaqataaffiginngilaat.

**Partii Naleraq**

Suliamut qaffasissumik piginnaasaqarnissamik piunasaqaatit akuerineqassappata innuttaasut kalaallisuinnaq oqaasillit mattunneqassasut Partii Naleraq isumaqarpoq. Aammattaaq siunnersuutip ilaa siulersuisunut ilaasortat tallimaasut ilaannik sisamanik Naalakkersuisut toqqaasarnissaannik imaqartoq KNR-ip ingerlanneqarnerani pitsaassutsimik pisariaqartinneqartumik qulakkeerinnissinnaanngitsoq Partii Naleraq isumaqarpoq. Radiup tv-llu innuttaasunik kiffartuussisussaanerata atuuttup naalakkersuinermut attuumassuteqartuunnginnissaa ingerlateqqinneqassasoq Partii Naleraq isumaqarpoq.

**Ataatsimiititaliap siunnersuummik suliarinninnera:****Naalakkersuisumik apersuineq**

Siunnersuutip siullermeerneqarnerani apeqqutit partiinit saqqummiunneqartut qulaajarumallugit ataatsimiititaliap Naalakkersuisoq ulloq 23. april 2014-imi apersorpaa. Tamatuma peqatigisaanik naalakkersuinikkut isumaqatigiinnginneq siunnersuutip siullermeerneqarnerani oqariartuutiginneqartoq tungavigalugu Naalakkersuisut naaperiaanissamut piunassuseqarnissaat kissaatigineqartoq ataatsimiititaliamit oqaatigineqarpoq. Naalakkersuisup oqaasissaasa allattorsimaffiata assilineqarnera isumaliutissiissummut ilanngussaq 1-itut ilanngunneqarpoq.

Apeqquutit pingaarnepaat ilaat tassaavoq siulersuisunut ilaasortassanik toqqaasarneq – KNR-ip siulersuisuisa katitigaanerannik allannguissamut Naalakkersuisoq piareersimanersoq aalajangersimasumik sammineqarluni. Naalakkersuisoq tamatumunnga akivoq aaqqissuussinerup allanngortinneqarnissaa tunuarsimaarfiginagu, taamaalillutik Naalakkersuisut taamaallaat ilaasortanik marlunnik toqqaannartumik toqqaasalerlutik. Naalakkersuisup siunnersuutigaa Naalakkersuisut siulittaasumik ilaasortamillu ataatsimik toqqaannartumik toqqaasassasut siulersuisunullu ilaasortat marluk tusagassiornermut ilinniarfiup/ilisimatusarfiup aammalu EPI-p inassuteqarnerat malillugu toqqaarneqartassasut.

Naalakkersuisumik apersuinermi apeqquut alla oqaluuserineqartoq tassaavoq inatsisissatut siunnersuummi § 31, imm. 3-p kingunerisaanik KNR-ip siulersuisuni ilaasortassanut piginnaasatigut piumasagaatit qaffasissut. Innuttaasut ataasiinnarnik oqaasillit KNR-ip siulersuisuni ilaasortaanissamut mattunneqarnissaat piumasagaatit kingunerisinnaagaat ataatsimiinnermi ilaatigut oqaluuserineqarpoq.

Tassunga Naalakkersuisoq akivoq innuttaasut ataasiinnarnik oqaasillit siulersuisuni ilaasortaanissamut mattunneqarnissaat inatsisissatut siunnersuummi siunertaanngitsoq, tamannalu paatsuinermit aallaaveqartoq.

Aamma Naalakkersuisoq isumaqarpoq piumasagaatit qaffasissuunissaannik aalajangersaanermit tunuliaqutaasoq tassaasut arlaannaannulluunniit attuumassuteqanngitsumik misissuinermit december 2012-imi ingerlanneqartumit kaammattuutit. Piginnaasassatut piumasagaatit pillugit allakkatigut erseqqinnerusumik paasissutissat apersuinermi ataatsimiititaliap pissarsiarai. Taakku Naalakkersuisup oqaasissaasa allattorsimaffiat ilanngullugu isumaliutissiisummut uunga ilanngussaq 1-itut ilanngunneqarput.

Kiisalu apersuinermi Naalakkersuisup oqaatigaa utoqqaat peqatigiiffiisa kattuffiat aammalu KANUNUPE Atuisut Siunnersuisoqatigiiffiannut inassuteqarsinnaatitaanissaannik, taamaalillutillu taakku isummersuutaasa allat tassigalugit tusarneqarsinnaanissaannik ataatsimiititaliap kissaataa Naalakkersuisunit akuersaartumik pissuseqarfigineqarpoq.


Siuliani isummersuutit tunngavigalugit ataatsimiititaliamit **kaammattuutigineqassaaq KNR-ip siulersuisuisa katitigaanerat Atuisullu Siunnersuisoqatigiiffiannut inassuteqarsinnaatitaaneq pillugit Naalakkersuisut pingajussaaneerinissaq sioqqullugu allannguutissatut siunnersuummik saqqummiussissasut, taamaalilluni:**

- KNR siulersuisunit tallimanit ilaasortalinnit siulersorneqarsinnaaqqullugu, taakkunanillu siulersuisut siulittaasuat ilaasortarlu ataaseq Naalakkersuisunit toqqarneqarlutik.
- KNR-imi aalajangersimasumik atorfeqartut inassuteqarnerisigut ilaasortaq ataaseq Naalakkersuisunit toqqarneqarsinnaaqqullugu.
- Tusagassiornermut Ilinniarfiup/Ilisimatusarfiup inassuteqarnerisigut ilaasortaq ataaseq Naalakkersuisunit toqqarneqarsinnaaqqullugu.
- EPI-p inassuteqarneratigut ilaasortaq ataaseq Naalakkersuisunit toqqarneqarsinnaaqqullugu.
- Utoqqaat peqatigiiffiisa kattuffiat aammalu KANUNUPE Atuisut Siunnersuisoqatigiiffiannut inassuteqarsinnaatitaaqqullugit.

**Inassuteqaat**

Tamanna tunngavigalugu ataatsimiititaliap siuliani kaammattuutai naapertorlugit Naalakkersuisut allannguutissatut siunnersuummik saqqummiussereerneranni siunnersuutip iluserilikkamisut iluseqartup **Inatsisartunit akuersissutigineqarnissaa ataatsimiititaliamit isumaqatigiittumit inassutigineqarpoq.**

Taama oqaaseqarluni ataatsimiititaliap siunnersuut aappassaaniigassanngortippaa.




Per Berthelsen




Karl-Kristain Kruse



Juliane Henningsen



Harald Bianco



Randi Broberg



Kultureqarnermut, Ilinniartitaanermut Ilisimatusarnermut Ilageeqarnermullu  
Ataatsimiititaliaq  
v/Bibi Mikaelsen

Ilanngussaq  
Bilag 1

**Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisumik isumasioqqatigiinnissamut aggeqqusissutaa**

22-04-2014  
Sags nr. 2013-091201  
Dok. nr. 1553135

Postboks 1029  
3900 Nuuk  
Tlf: +299 34 50 00  
Fax +299 32 20 73  
Email: iiknn@nanoq.gl  
www.nanoq.gl

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap radiukkut tv-kullu aallakaatitsisarneq pillugu inatsisartut inatsisissaattut siunnersuut pillugu ullormut oqaluserisassap UPA2014/145-p siul-lermeerneqarnerata kingorna isumasioqqatigiinnissamut aggeqqusissut nassiup-paa.

Ataatsimiititaliaq tassunga peqatigitillugu arlalinnik apeqquteqarpoq, taakkulu Naalakkersuisut apeqqutit ataasiakkaat ataani akivai.

1. Naalakkersuisup suli siulersuisuni ilaasortanit tallimaasunit sisamat naalakkersuisup toqqarneqartarnissaat attappaa?

**Akissut:** Soorlu siusinnerusukkut oqaatigereeriga, tassunga ilanngullugit inatsisissatut siunnersuuttip siullermeerneqarneranut ataatsimiititaliamillu siusinnerusukkut oqaloqatiginnittarninnut atatillugu, siunnersuummi allaqqasumiit allaanerumik siulersuisut allatut katitigaanissaasa oqaloqatigiissutiginnissaanut piareersimavunga. KNR-ip suliamik ilisimasaqartunik siulersuisoqarnissaat uannut pingaaruteqarpoq siulersuisunilu ilaasortat ataatsimut KNR-ip ingerlatsinerani pingaarnerpaanik piginnaasaqassasut. Tamassuma saniatigut pingaartuuvoq siulersuisuni ilaasortat ataasiakkaat toqqarneqarnerminni tunngaviusunik siulersuisuni suliamik ingerlatsinerami uppernarsarneqarsinnaasumik piginnaasaqassasut. Suli- amik ilisimasaqartunik siulersuisoqarnissaanik kissaateqarneq ilaatigut Epinio- nip sumlluunniit attuumassuteqanngitsutut nalunaarusiaanik ingerlatitseqqiiner- tut isigineqassaaq. Siulersuisut suliamik ilisimasaqartut KNR-ip inuiaqatigiinni tusagassiiviuneranik ineriartortitsissapput aammalu KNR-ip akisussaassuseqar- tumik pitsaasumillu aningaasatigut ingerlatsinissaa qulakkiissallugu.

1a) Inatsisissatut siunnersuummi saqqummiunneqartut KNR-ip siulersuisuini sisamat pinnagit marluk Naalakkersuisunit toqqarneqartassappata Naalakkersui- sut qanoq isumaqarpat?

**Akissut:** Naalakkersuisut taamaallaat ilaasortanik toqqaannartumik toqqaasar- nissaannik aqqissuineq Naalakkersuisut ajorinngilaat. Tassunga atatillugu isu-

maliutigineqarput siulittaasoq ilaasortarluk alla Naalakkersuisut toqqaannartumik toqqartassagaat, siulersuisunilu ilaasortat marluk kattuffiit innersuussereernerisigut toqqarneqartassasut.

Naalakkersuisut siunnersuutigaat siulersuisut atuuffissaat toqqarneqartassasut inassuteqaateqareernikkut:

- Tusagassiortunngorniat ilinniarfiata / Ilisimatusarfiup siulersuisuni ilaasortassaq ataaseq innersuussutigisassavaa. Taanna Kalaallit Nunaanni tusagassiortarnermut tunngatillugu tusagassialerinerimik suliaqarnermik anertuumik piginnaasaqassaaq.
- EPI-p siulersuisuni ilaasortassaq ataaseq inassuteqaatigissavaa. Taanna eqqumiitsuliormik kulturimillu annertuumik assigiinngiaartunillu ilisimasaqassaaq.

Oqaatigineqassaarli inatsisip allap, tassa angutit arnallu naligiissitaanerat pillugu Inatsisartut inatsisaata kinguneranik siulersuisuni ilaasortaaffinnut ataasiakkaanut innersuussuteqartoq angummik ataatsimik arnamillu ataatsimik innersuussisasoq, tamannalu aamma sinniisussanut atuuppoq.

Naggasiullugulu, ilaasortaq kingulleq, soorlu inatsisissatut maannakkut siunnersuummi allaqqasoq, aalajangersimasumik sulisut innersuussuteqareernerisigut Naalakkersuisut toqqassavaat.

Ataatsimiititaliami amerlanerussuteqartut siulersuisunik toqqaanermi periusissatut siunnersuut akuerissappassuk periusissatut siunnersuut taanna ilanngullugu allannguutissatut siunnersuummik Naalakkersuisut saqqummiinarput.

2. Kiisalu partiit oqaaseqartartuisa arlallit tikkuarpaat, siulersuisuni ilaasortassanut tunngatillugu piumasaqaatit annertuallaarneri, taamaalillunilu suliaqarfiit arlallit piginnaasatigut mattunneqareerlutik, soorlu nunaqavissut ataasiinnarmik oqaasillit.

**Akissut:** Tassunga atatillugu erseqqissassallugu pingaaruteqarpoq inatsisissatut siunnersuummi oqaatsit pillugit piumasaqaateqartoqanngitsoq. Taamaammattamaani najugallit ataasiinnarmik oqaasillit siulersuisunut toqqarneqarsinnaanerat akornutissaqanngilaq.

2 a) Tamatumunnga atatillugu ataatsimiititaliamit Naalakkersuisoq aperineqassaaq, piginnaasatigut piumasaqaatigineqartutut ataatsimiititaliamut saqqummiunneqartut inatsisartuni partiit ilaasortaataannut tamanut saqqummiutissamaarnerai?

**Akissut:** Sunik piginnaasaqarnissaq ataatsimiititaliap tamanna kissaatigippagu Naalakkersuisut Inatsisartunut ilaasortanut tamanut saqqummiukkusuppaat. Soorluli siusinnerusukkut akissummi ersittoq piginnaasat pillugit maannakkut inatsisissatut siunnersuummik allaanerusumik siulersuisunut toqqaariaatsimut siunnersuummit allamit sunnerneqarsinnaapput.



Tassunga atatillugu ilisimatitsissutigineqarsinnaavoq kattuffik ataaseq arlalliluunniit avataaneersut siulersuisunut ilaasortassanik innersuussisassappata sunik piginnaasaqarnissaq innersuussisinnaatitaanermut toqqaasinnaatitaanermullu atatinneqarnissaa isumaliutigineqartoq.

Tamassuma saniatigut isumaliutigineqarpoq, ilaasortat marluk Naalackersuisut toqqaannartumik inassuteqartitsinatik toqqagassani ataaseq aningaasanik aqutsinermik allalu ataaseq sulisoqarnermik suliffeqarfimmilu periusissiornermik piginnaasaqarnerat tunngavigalugu toqqarneqassasut. Piginnaasaqarneq siulliullugu taaneqartoq KNR-imut aningaasaliissutit annertungaatsiarnerat tunngavigalugu kingullertullu taaneqartoq suliffeqarfik KNR-itut angissuseqartoq tunngavigalugu, tassani sulisut pingaarnertut isumalluutaallutik, assersuutigalugu sulisunik ineriartortitsinissaq, sulisut sulisoriinnarnissaannut sulisussarsiortarnermilu suliniutinik minnerunngitsumillu ilinniartitseqqinnissamut apeqqutinik annertuumik isiginiagaqassasut.

3. Inatsisissatut siunnersuummi saqqummiunneqarpoq Naalackersuisut Atuisartut siunnersuisoqatigiinnik KNR-mi siulersuisunut isummersuisussani pilersitsinissamik pilersaaruteqartut. Ataatsimiititaliamit tamatumunnga atatillugu tusarusunneqarpoq utoqqaat peqatigiiffiisa kattuffiat Naalackersuisunut ilanngunniarnerseq, ataatsimiititaliamit naatsorsuutigineqarmat taakkuusutisiginnaartartut tusarnaartartullu siunnersuisoqatigiinni sinniisoqartariaqartut.

**Akissut:** Inatsisissatut siunnersuummi § 33 allanngortinnissaa Naalackersuisut maannakkut akuerisinnaavaat, taamaalilluni Utoqqaat Peqatigiiffiat Atuisut Siunnersuisoqatigiinut aallartitaqartarnermut tunngatillugu inassuteqaateqarsinnaatitaassalluni.

3a) Ataatsimiititaliaq aamma isumaqarpoq Naalackersuisut isumaliutigisariaqaraat KANUNUPE (nuna tamakkerlugu nunaqarfiit peqatigiiffiat) Atuisut siunnersoqatigiivinut ilaasortaataqarnissaa, allat periarfissinneqarnerattulli isummersuutaat tusaaneqarsinnaaqullugit.

**Akissut:** KANUNUPE-p sinniisussaanic Atuisut Siunnersuisoqatigiivisa amerlineqarnissaannut tunngatillugu Naalackersuisut aamma ajoriffissaqartinnigilat, taamaalilluni nunaqarfiit isumaat Atuisut Siunnersuisoqatigiiffianni ilanngunneqarsinnaassallutik.

Inussiarnersumik inuulluaqqusillunga



Nick Nielsen

**KNR-ip siulersuisuini piginnaasatigut qanoq ittuunerinut ilisarnaatit.**

**1: Aningaasaqarneq pillugu piginnaasat.**

*Ilinniagaq:* Aningaaserivimmi ilinniagalik, inuussutissarsiornikkut aningaasaqarnermut ilinniagalik (civiløkonom), naatsorsuuserinermi kukkunersuisutut ilinniagalik imaluunniit tassunga assingusumik ilinniagalik.

*Inuussutissarsiornikkut misilittakkat:* Pingaarnertut missingersuutinut akisussaaffeqarluni (25 mio. kr.+) atorfeqarnermit piffissami sivilunerusumi misilittagalik imaluunniit aningaasaqarikkut siunnersortitut piffissami sivilunerusumi atorfeqarnermit pingaarnertut namminersorluni siunnersuineramik misilittagalik.

*Siulersuisuni pingaarnertut atuuffiusoq:* Suliniutit pilersaarusiukkat aamma pingaarnertut aningaasaqarikkut suleriaatsip imminnut ataqatigiinnissaat qulakkiissallugu. Ingerlatsinikkut eqaallisaanermut pingaarnertut suleriaatsimut peqataasinnaaneq.

**2: Inunnik isumalluutitut (Human Resource - HR) aamma pilersaarusiornermut piginnaasat**

*Ilinniagaq:* Niuerneq pillugu kandidatitut ilisimatusarsimasoq (Cand.merc.) immikkut sammisaralugit HR, aaqqissuussaanagermik aqutsinermillu ilinniaqqissimasoq (HD-O) imaluunniit allamik naleqquttumik qaffasissumik ilinniagalik.

*Inuussutissarsiornikkut misilittakkat:* Suliffeqarfimmi annermi (sulisut + 50) aqutsinermik qaffasissusilimmik piffissami sivilunerusumi misilittagalik, atorfimmi pingaarnertut ilaassapput inunnik isumalluutitut (HR) suleriaatsimik aamma aaqqissuussaanagermik ineriartortitsinerit. Tassani siulersuisut qanoq ittuunerinut ilisarnaammi ileqqusumik ilinniarsimanermit uppersakkamit misilittagaqarneq pingaarnertuvoq.

*Siulersuisuni pingaarnertut atuuffiusoq:* Piginnaasat ineriartortinnerani aamma aaqqissuussaanagermik naleqqussarnerani piffissaq ungasinnerusooq isigalugu qulakkiissallugu, sapinngisamik annertuumik nunaqavissunik KNR-ip sulisoqarsinnaanerata qulakkeerneqarnissaa, soorlu tusagassiornikkut piginnaasanut tusagassiorfimmilu nutaaliaasumi teknologimik piumasaqaatinut malinnaasumik.

**3: Nunat assigiinngitsut akornanni tusagassiuutitigut piginnaasat**

*Ilinniagaq:* Piumasaqaataasumik ilinniarsimanermit piumasaqaateqanngilaq, kisianni qaffasissumik ilinniagaqarsimanissaq naatsorsuutigineqassaaq

*Inuussutissarsiornikkut misilittakkat:* Kalaallit Nunaata avataani tusagassiuutitut aqutsinermik qaffasissumik misilittagaqarneq. Innuttaasunik kiffartuussivimmit misilittagaqarneq iluaqutaasorujussuussaaq. Tusagassiuummi minnerpaamik TV-p iluani suliniutit ilaassapput, kisianni KNR-ip sullissinermini tusagassiuutitut aallaavigisai tamakkerlugit ilanngussinnaassavai. Tusagassiorlutut sulineramik misilittagalik.

*Siulersuisuni pingaarnertut atuuffiusoq:* KNR-ip pingaarnertut suleriaasianut sunniuteqarsinnaasut nunat assigiinngitsut akornanni tusagassiuutitigut ineriartorneq pillugu ilisimasat nutaanik ilaartornerat ingerlaavartumik qulakkiissallugu. Nunat assigiinngitsut akornanni pilersaarusiornikkut KNR-imut peqatiginninnerata pilersinneqarnera suleqataaffigissallugu. Pingaarnertut tusagassiornikkut ileqqorissaarnerup aamma isornartorsiuisumik tusagassiornerup qularnaariffiginissaa aamma siuarsaaqataaffigissallugu. Aningaasaqarnikkut suleriaasissamut ilanngullugit teknologiikkut tusagassiorsinnikkullu ineriartorfiunerusut eqqarsaatigineqarnissaat qulakkiissallugu.

#### **4: Kulturikkut eqqumiitsuliornikkullu piginnaasat**

*Ilinniagaq:* Piumasaqaataasumik ilinniarsimanermit piumasaqaateqanngilaq.

*Inuussutissarsiornikkut misilittakkat:* Atuuffiusumut tassunga assigiinngitsorpasuumik inuussutissarsiornikkut misilittagaqarneq naleqquttuusinnaavoq. Suliffeqarfimmit pingaarutilimmik kulturikkut atatitsisumut sulisutut eqqumiitsuliornikkut ataqtigiiissaarisutut misilittagaqartuusinnaavoq imaluunniit qaffasissumik eqqumiitsuliornikkut sulialittut misilittagaqartuusinnaavoq. Inuiaqatigiinni eqqumiitsuliornermi kulturikkullu annertuumik sinaakkusiisinnaaneq pingaaruteqarpoq, eqqumiitsuliornikkut kulturikkullu sammisani killilimmik taamaallaat piginnaasaqarnermit taarsiullugu inuiaqatigiinni eqqumiitsuliornermi kulturikkullu annertuumik sinaakkusiisinnaaneq pingaaruteqarpoq.

*Siulersuisuni pingaarnertut atuuffiusoq:* KNR-ip kulturikkut atatitsisutut atuuffia aamma Kalaallit Nunaanni suliffeqarfittut akunnermiliuttuunera pilersaarusiornermi qularnaariffigineqarnera peqataaffigissallugu. Kulturikkut assigiinngitsutigut isiginninnerup sapinngisamik amerlasuunit paasineqarnerata KNR-ip suleriaasissaanut ilanngunnissaa qulakkiissallugu.

#### **Siulersuisunik toqqaanermi kultureqarnermut ataatsimiititaliap ilanngutsinnera.**

Naalackersuisup qinigassat sisamat kissaatigineqartut kultureqarnermut ataatsimiititaliamut saqqummiutissavai.

Taakkua ilaat siulersuisuni siulittaasutut Naalackersuisumit qinerneqartoq aamma inaarutaasumik qinersinerussaaq. Siulittaasumik qinersinermit tassunga tunngatillugu, Naalackersuisut siulittaasumik toqqaanerat, malittarisassanut maannakkut atuuttunut naapertuutissaaq.

Qinigassat allat pingasut ataasiakkaanut tamanut (katillugu siulersuisunut piukkunneqartut arfinillit) qinigassat allat ilanngullugit saqqummiunneqassapput. Tamatuma kingorna inassutigineqartut ataasiakkaat qinigassallu allat paarlaatillugit inissiternissaat ataatsimiititaliap kissaatigisinnavaa. Siulersuisussatut piukkussat saqqummiunneqartut iluanni ataatsimiititaliamit allannguutissatut kissaatigineqartut aallaaviusumik Naalackersuisup najoqqutarissavai. Matuma kingorna pissusissat malillugit Naalackersuisoq toqqaassaaq. Allannguutissatut kissaatigineqartuni ataatsimoortumik inassuteqaammi naligiissitaaneq pillugu inatsit eqqortinneqarnerusoq ataatsimiititaliap nakkutigissavaa.